



Sesida dals

Communitgà ils

Protocol nr.

10 da zercladur 2025

11 da zercladur 2025

432/2025

### **Dumonda da la fracziun da la PS**

concernent la protecziun da whistleblowing en il Grischun  
(emprima sutsegnadra Müller)

### **Resposta da la Regenza**

*Tar la dumonda 1:* Il chantun persequitescha attentamain ils svilups sin plaun internaziunal e sin plaun federal. Cumbain che recumandaziuns e best practices (internaziunals) n'èn betg liants, èn els vegnids e vegnan els resguardads en connex cun l'ulteriur svilup da la protecziun da whistleblowing en il Grischun. Quai sa mussa a maun dal fatg, ch'i existan sin plaun chantunal plirs mecanissemes en connex cun whistleblowing:

Per incunvegnyentschas en connex cun acquisiziuns prevesa il dretg d'acquisiziun chantunal in post d'annunzia che po vegnir contactà da tut las persunas. Il dretg da persunal protegia las collavuraturas ed ils collavuratur dal chantun, che annunzian en buna fai ed onestamain incunvegnyentschas. Per quest intent pon ellas ed els sa drizzar al Post per l'annunzia d'incunvegnyentschas en il sector dal persunal. Tuts dus posts d'annunzia chantunals èn independents ed externs. Els prendan er encunter annunzias anonimas. Incunvegnyentschas pon ultra da quai er vegnir annunziadas al post da servetsch chantunal cumpetent u a l'autorità da surveglianza respectiva (cf. risposta a la dumonda Perl concernent l'annunzia d'incunvegnyentschas, PCG 1 I 2023/2024, p. 110). Ulteriurs mecanissemes existan per exempel en il sector da sanadad (cf. risposta a la dumonda Rutishauser concernent l'installaziun d'in post da mediaziun e da whistleblowing per il sector da sanadad, PCG 5 I 2024/2025, p. 822 s.).

Il tema whistleblowing ha procurà en tscherts cas per ina gronda atenziun publica en il chantun Grischun. Sch'ins contempla l'entira situaziun, mussa la pratica dentant, ch'i dat paucs cas e ch'ils mecanissemes existents funcziunan.

*Tar la dumonda 2:* Whistleblowing pertutga differents secturs giuridics, en spezial il dretg da lavur, il dretg da societads ed il dretg penal sco er la protecziun da datas (guardar missiva tar la revisiun parziala dal Dretg d'obligaziuns [protecziun en cas d'annunzias d'irregularitads al plaz da lavur], Fegl uffizial federal 2013 9513,

p. 9523 ss.). Per quests secturs giuridics è la Confederaziun per gronda part cum-petenta suletta. L'Assamblea federala ha dentant refusà repetidamain da daventar activa sin plaun legislativ (refusa da la moziun Noser, 23.3844, «OECD-Antikorrup-tionskonvention. Verschärfung der nationalen Umsetzung», onn 2024; decisiun da betg entrar en la revisiun parziala dal Dretg d'obligaziuns menziunada, onn 2020). Sut quest aspect n'èsi betg pussaivel da meglierar sin plaun chantunal efficaciamain la protecziun da whistleblowing – cunzunt betg en l'economia privata. Las malsegi-rezzas giuridicas creadas en il dretg federal n'han betg pudì vegnir eliminadas.

*Tar la dumonda 3:* Sche las communitads en il chantun Grischun chaschunan cum-provadamain donns, ston ellas star bunas per tals tenor il dretg davart la responsa-bladad dal stadi (cf. conclus da la Regenza [concernent l'examinaziun da las preten-siuns d'indemnisaziun dad Adam Quadroni] dals 28 da schaner 2025 [prot. nr. 44/2025], p. 4 ss.). Ina basa legala speziala per pagar ina indemnisaziun (facultativa) ad ina infurmanta u ad in infurmant che ha agì en l'interess dal chantun, n'exista betg en il dretg chantunal. Cuntrari a quai enconuscha il dretg da la UE la Directiva da whistle-blowing 2019/1937. Quella cuntegna er disposiziuns davart mesiras da sustegn (sco l'agid als custs da process) per infurmantas ed infurmants ed incumbensescha ils stadis commembers da prevair en il dretg naziunal mesiras da protecziun cunter repressalias.

Er en Svizra stuess ina tala regulaziun vegnir stgaffida sin plaun naziunal, perquai ch'ils secturs ch'èn da reglar – sco la chargia da cumprova u l'indemnisaziun dal donn – pertutgan il dretg civil ed il dretg da procedura civila. Per quests secturs giu-ridics è cumpetenta la Confederaziun. La creaziun d'ina basa legala fiss ultra da quai cumbinada cun dumondas giuridicas e finanzialas complexas (premissas, criteris per calcular ils donns, consideraziun da donns immaterials, mesiras betg monetaras, cun-finaziun cun meds giuridics existents e.u.v.). Gist er per evitar malsegirezzas giuridi-cas respectivas, duvrassi ina soluziun per l'entira Svizra. Perquai n'èsi ni pussaivel ni raschunaivel da stgaffir sin plaun chantunal ina regulaziun cumplessiva per indem-nisar infurmantas ed infurmants. La Confederaziun refusa dentant fin ussa quai (cf. risposta a la dumonda 2).



En num da la Regenza

Il president:

Marcus Caduff

Il cancellier:

Daniel Spadin